

REGIONAL NEWS

HEADLINES:-

1. Chief Minister Pu Lalduhoma'n fur ruahtui tam tham tak lo thlengin Mizorama chhiatna a thlen mek chungchangah mi pawimawhte inkhawm a ko.
2. State Meteorological Centre sawi danin Mizoram hmun hrang hrangah June ni 7 thleng hian ruah la tla tura ngaih a ni.
3. Kar kalta Ningani a Mizorama Covid-19 hri kai hmuchhuah tharte sample chu tunkar bul lamah hian eng Covid-19 chi ber nge tih endik turin Kolkata a thawm tum a ni.
4. Party hrang hrang MP-te telna team 7-in India-in a firfiaka chetna a do zia puangzar turin khawvel ram hrang hrang an tlawh kual chhonzawm zel.

<><><>

CM MEETING

Vawiin tlai lam khan Chief Minister Pu Lalduhoma chuan fur ruahtui tam tham tak lo thlengin Mizorama chhiatna a thlen mekte chungchang sawihovin mi pawimawhte inkhawm a ko.

Chief minister hova inkhawmah hian Minister leh official pawimawh te bakah district bawrhsap te'n biakhmuhtheih hmangin an zawm bawh a. He inkhawmah hian, hmun hrang hranga chhanchhuahna hna thawktute, khualzin tangkhang duat taka lo tanpuia, eitur leh riahna lo ngaihtuhsaktute zawng zawng chungah lawmthu sawiin, zo nun ze mawi lantir a, tanpui ngaite lo tanpui zel turin a ngen a ni. An thurel zingah district hmunpuite inkalpawhna leh thlawhna tumhmun kawng ngaih pawimawh hmasak ni se, district disaster management authority (DDMA)-ten chak taka hna an thawh zel theih nan a rang lama fund pek chhuah zel ni se, chhawmdawlina (relief fund) pawh a ranglama pek chhuah zel ni se, an ti a. Chhiatna thlenna hmun umzuina lam chu DM & R ngaichang chungah kalpui zel ni se, central sawrkarah harsatna hrang hrang te report fel fai taka thehluh thuai ni se, an ti bawh. Chhiatna thleng tam tak hi mihring siam (man-made) atanga lo intan niaa a lan thin avangin, he mi kawngah hian khauh leh zuala kal tha an tih thu tarlan a ni a, chhanchhuahna lam thiam neih tam deuh deuh a tul thu sawi a ni bawh.

DM & R lamin report an dawn chinah hmun 211 ah leimin a awm a, in chim 60 a awm a, in rauhsan 69 awmin , hmun 83 ah kawng a ping a, retaining wall chim 4, electric ban tlu 1, lei tlahniam 2 leh mitthi 5 an awm a, tui lian report pawh a awm nual. Chhiatna thleng report hi an thutkhawm lai pawh hian a la awm belh a ni.

PWD enkawl kawng hmun 21 ah a ping mek a, Serchhip, Thenzawl leh Sialsuk vela khualzin tangkhangte chhuah theihna turin chak taka hna thawh mek a ni.

Power & Electricity report dan in 33 KV Sub Station pasarih a chhia a, Mizoram pumpui hmun thuma thena hmun khat aia tam mahin harsatna an tawh mek a, A siam that hna hi thawh reng a ni a, khua a that chuan ni hnih,ni thum chhunga an siam that vek theih an inbeisei ani.

PHE report dawn chinah hmun 50 velah chhياتna an dawng a. Kolasib tui pump khawl, Keitumah Solar Pump khawl leh Hnahthial pump te chu tuilianin a chim a. Line chhia hmun enge maw zatah a awm.

Supply department lam chuan Monsoon Stock an nei zo fel hman a, engmah harsatna a thleng lo turah an ngai ani.

Bawrhapte'n an district dinhmun report an pe bawk.

Thutkhawmna-ah hian Home Minister Pu K. Sapdanga, PWD minister Pu Vanlalhlana, DM&R minister Prof. Lalnilawma, leh Power minister Pu F. Rodinglana te bakah sawrkar official pawimawh te an tel a ni.

<><><>

WEATHER FORECAST

Khawchin thlir lawktu State Meteorological Centre sawi danin vawiin hian Mizoram hmun hrang hrangah ruah a sur nasa hle a, June ni 7 thleng hian ruah la tla tura ngaih a ni.

Khawchin thlir lawktute chuan hmun thenkhatah chuan thli leh ruah tam tham deuh thawk thei a nih avangin mipuite chu fimkhur turin an chah a. Furpui chhunga ruahsur nasa leh thlipui tleh avanga chhياتna hrang hrang thleng thei laka an him theih na'n mipuite chu mahni in leh lo te thli leh ruah dawl thei turin a tul anga thawmtha tur leh rangva leh thil dang thlawk thei awmte hmun him lama senghawi turin an chah a, in hmunhma chhe thei mai te chu hmun him lam pan turin an chah bawk a ni.

<><><>

MONSOON DISEASE

Furpui laia tui thianghlim lo leh eitur thianghlim lo atanga natna kai theih hrang hrang lakah fimkhur turin Directorate of Health Services-a thawkte'n mipui an chah.

Akashvani regional news unit-in a kawmna-ah Directorate of Health Services hotu Dr. Lalthanmawii Khalthang chuan furpui laiin tui thianghlim lo leh eitur thianghlim lo atanga natna kai theih zingah Typhoid, Thin lian (Hepatitis A), leh Tuihri (Cholera) te chu natna tlanglawn a ni tih a sawi a. Hei bakah hian tun ang Fur khua, khaw hnawngah hian thosi an puang duh hle tih sawiin, Thosi seh atanga natna kaitheih Malaria leh Dengue lakah fimkhur a ngai hle tih a sawi a, nikum khan Malaria leh Dengue mi 20 chuangin an thihpui tih a sawi a ni.

Dr Lalthanmawii chuan heng natna lanchhuah dan hrang hrang-khawtha lo, luak, khawsik, taksa na them thum, lu na, taksa sen chhuak, mit liam, thian lian nei te chu thisen test vat a doctor pan thin turin a chah a, heng natna te hi hmuhchhuah thuai a, tha taka enkawl a nih chuan a dam leh thuai theih a, a hlauhawm loh a ti a, tui thlitfimna, Filter tha nei thei lote tan tuichhuanso in thin turin a chah a, fur laiin kawngsira eitur zawrh te pawh ei fimkhur zual a ngaih thu leh, in lamah pawh chawhmeh thing te uluk taka chhuang so thin turin a chah a, hei bakah hian tui tlin theihnaah thosi piang tur ven nan tel emaw petrol emaw leih thin turin a chah bawk a ni.

<><><>

VC

Mizoram University a vice chancellor hmasa ber Prof. Arvind Kumar Sharma chu nizan dar 6.10 khan a thi.

Prof. AK Sharma hian July ni 1, 2001 khan Mizoram University vice hna a zawm tan a, January ni 2, 2006 thleng he hna hi a chelh ani. Zirtir kawngah leh inrelbawlna lamah mi thiam a ni a, Mizoram University din a nih chhoh lai a a sulsutu leh inrelbawlna bakah zirtirna kawnga tun dinhmun a din theihna atana hmahruaitu pawimawh tak a ni. Hruaitu a nihna leh a thiamna avangin ram puma mithiamte ngaihsan hlawh leh zah phur pha a ni a. Mizoram University chuan an uizia thu social media kaltlangin an tarlang a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

COVID-19

Kar kalta Ningani a Mizoroma Covid-19 hri kai hmuchhuah tharte sample chu tunkar bul lamah hian eng Covid-19 chi ber nge tih endik turin Kolkata ah thawn tum a ni.

Integrated Disease Surveillance Programme (IDSP) state nodal officer Dr. Vanlalrengpuia Chinzah sawi danin tun dinhmunah Mizoramah eng Covid-19 chi (variant) ber nge tih endikna a awm loh avangin Covid-19 hri kai hmuhchhuah tharte sample hi la-in eng ang chi ber nge tih hre turin (genome sequencing) thawn turin buatsaih a ni a, khawvel ram danga Covid-19 hri a len thar leh hnu a ram chungah he hri kai mi 3,400 vel an awm leh tak hnu hian an hri kai chi tlanglawn berte chu JN.1, XFG leh LF.7.9 ti a vuate a ni a. A lan chhuah dan a nasa vak lo hlawm a, natna lo nei sa leh kum upa lam tih loh chuan an thihpui vak lo ni a hriat a ni. Kumin chhung hian Mizoramah Covid-19 hri kai ni a inringhlel mi 189 sample endik a ni tawh a, puan tawh angin mi 2-in an vei tih hmuhchhuah a ni a. An pahnih hian tun hnai a Mizoram pawna zin an nih loh avangin mi dang zin haw hnen atanga an kai a nih rin a ni a. Tunah hian Falkawn a Zoram Medical College & Hospital-ah enkawl mek an ni a, an dinhmun a hlauhawm lo ni a sawi a ni.

<><><>

OUTREACH ON OPERATION SINDOOR

Operation Sindoor hnuaia India-in a firfiaka chetna a do zia, puan darh hna thawktu, party hrang hrang MP-te telna team 7-te chuan ram hrang hrang an tlawh kual chhunzawm zel a, Cong MP Shashi Tharoor-a kaihhruai palaite chuan vawiin khan Brazil ram khawpui Brasilia thlengin Brazil ram hruaitute leh Parliament member-te bakah President Head Adviser leh Foreign Affairs Secy General-te an kawm ang.

Shiv Sena MP Shrikant Shinde-a kaihhruai palaite chu Liberia-ah an awm mek a, Liberia President bakah parliament Speaker-te, Foreign Affairs Minister leh mipawimawh dangte an kawm dawn a ni.

JDU MP Sanjay Kumar Jha kaihhruai team pawhin Malaysia ram hruaitu pawimawhte leh parliament member-te hmu turin vawiin khan Kuala Lumpur an thleng a, BJP MP Baijayant Panda kaihhruai team chu Algeria-ah an awm mek a, BJP MP Ravi Shankar Prasad-a kaihhruai palaite pawhin London an thleng tawh a ni.

DMK MP K. Kanimozhi kaihhruai team chuan Spain sorkar mipawimawhte hmu turin Madrid an thleng tawh a, NCP-SCP MP Supriya Sule-a kaihhruai team-in Ethiopia ram hruaitu pawimawhte an kawm kual mek bawk.

<><><>